



UKA17/35
11. oktober 2017
Hans Aronsen

Inatsisartut aalajangigassaatur siunnersuutigineqarpoq Naalakkersuisut peqquneqassasut UPA2018-imut Tunumi aalisarneq pillugu nassuiaat agguaatissagaat. Nassuiaatip imarissavaa Naalakkersuisut aalisarnikkut inerisaaniarlutik iliuusissaat – kiisalu innersuussutit, aalisarnerup inerisarnissaanut tunngasutigut siunnersuutaasut.

(Inatsisartunut ilaasortaq, Laura Táunâjik, Siumut).

Siunnersuummut:

Siullermik Laura Táunâjik qutsavigerusuppara Tunumi aalisarnermut pissutsit assigiinngitsut tunngavigalugit upernaamut 2018-mi ataatsimiinnissaannut Naalakkersuisut nassuiaasioqqusilluni siunnersuuteqarneranik. Manna qaqqinneqarmat Inuit Ataqatigiit sinnerlugit ilaasortaasartut kangitsinneersut Harald Biancokkut, Evald Brønlundikkut allallu qinikkat tappavangaanneersut eqqaavakka.

UPA 2016/72 Hans Enoksenimit oqallisissiaq unatut siunnersuutitut isikkulik pillugu oqallissutiginerani saqqummiussatta isumaata asserluinnaanik Inuit Ataqatigiinniik oqaaseqassaagut.

Qulaajaaneq suliassallu:

Apeqqut manna aallaavigalugu oqallikkaanni aalisarnerullu inerisarnissaanik siunertaqaraanni inuussutissarsiummik tamakkiisumik kipisuikkaartumillu aalisarnerup iluani aallartitsisoqarnissaanut suut kingaalaqutaanersut akimmiffiujuarnersulluunniit siulliullugit qulaajarneqaqqaartariaqarput aqqissuullugillu.

Ukiorpanngorpummi apeqqutit matumanisut ittut kommuninit inatsisartunit naalakkersuisuusartunillu qallorneqartartut, pimoorullugit suleqatigiissutigineqarlutik sulissutigineqartariaqalersut Inuit Ataqatigiinniik kissaatingaarput.

Tasiilaq eqqarsaatigalugu piffissani aalajangersimasuni ukiumut marloriarluni usinik assartuinikkut tikittoqakkajuppoq, taannaannarlunniit eqqarsaatigalugu aalisarnikkut inuussutissarsiummik ingerlatsiniarnikkut aallarnisaanikkulluunniit sanngiillissutaareerpoq.

Kiisalu Ittoqqortoormiit suli sikuunerusartumiittoq eqqarsaatigalugu aalisarnikkut inuussutissarsiornermi kipsisuitsumik ingerlatsisoqassappat periarfissat allat naleqquttullu ujartorneqartariaqarput.

Aalisarnerup ullumikkornit annertunerusumik inuussutissarsiuutaalernissaanut periarfissat ammaassisussat soorlu nukissiornermiippata, assartuinermiippata, imeqarnermiippata, sulisoqarnermiippata, nunatta avataani suleqatissarsiornermiippata, aalisarnermi angallatitigut inerisaanermiippata, tunitsivinniippata allallu ilanngunneqarsinnaasut eqqarsaatigalugit naalakkersuisoqarfiit arlallit aqqusaarneqartussaassapput. Taamaattumik naalakkersuisoqarfiit akunnerminni ataatsimiititaliallu akunnerminni susassaartut pingaartillugu suleqatigiissuteqarnissaat matumani Inuit Ataqatigiit pimoorullugu kissaatingaarput.

Nalilersuineq:

Ullumikkummi silaannaap kissakkiartornerata sunniutai sineriassuatsinni assigiinngitsunik atungassaqalersitsillunilu amerlanertigut inuussutissarsiutitigut ineriartortitsinissamut periarfissiivoq, tamannalu aalisarnikkut ineriatsuutaasussatut pitsaasutut qularutigineerussimappat atorluarneqartariaqartut Inuit Ataqatigiinniik isumaqarpugut.

Ullumikkullu Tunup sineriaata annersaata ukiunut siuliinut naleqqiullugu sikorsuaqartarnera sivikinnerulersimavoq, tamannalu paasivarput tappavani ukioq kaajallallugu imaani siukumilu angalasuusunit. Allaat oqaatigineqarluni umiarsuanit pajuttunit akulikinnerusumik tikinneqartarsinnaanera periarfissagissaarlualersimasoq. Kiisalu aalisakkat assigiinngitsut immap kissarnerulernera pissutigalugu takkusimaaleriartortutaaq oqaatigineqartarluni. Qaffasissumik oqaatigalugu: Ullumikkut ilimagisariaqarpoq tunup sineriarujussua Atlantikup imavittaanut attuumassuteqarnermigut, aalisakkatigut annertuumik isumalluutissarpassuaqarfigivarput soorlu avaleraasartuut takkunnerisa iluanaarutaallualernerisalu takutikkaat neriulluartariaqartugut. Taamatut oqaaseqarluta siunnersuut aalisarnermut ataatsimiititaliamut ingerlateqqinneqarnissaa innersuussutingaarput.